

فريق التفريغ بموقع الطريق إلى الله

يقدم

المعهد القرآني الدعوي

تفسير العنكبوت 14

(باللهجة المصرية)

لفضيلة الشيخ: د/ حازم شومان

رابط المادة:



اللهم لك الحمد كله وبيدك الخير كله وإليك يرجع الأمر كله، اللهم صل على عبدك ونبيك محمد صلى الله عليه وسلم في الأولين والآخرين وفي كل وقت وحين أما بعد،،،

إخواني وأحبائي في الله نستأنف الصفحة ونصف الأخيرة من سورة العنكبوت

"ويستعجلونك بالعذاب" جاءت بعد الآيات "قل كفى بالله بيني وبينكم شهيدا"

الصفحة التي فاتت صفحة أهل الكتاب ولا تجادلوا إلا بالتي هي أحسن

اتكلمنا عن القرآن الكريم، وإزاي القرآن هو المعجزة التي واجهنا الواقع بيها وهو الطريق إلى

اليقين بعد كل آيات القرآن التي بقالها 13 سنة بتنزل إلى مكة بعد كل آيات القرآن **"ويستعجلونك**

بالعذاب" يعني مضارع مستمر

يستعجلونك: أي أنه طلب مستمر لا يكفون عنه، خلاص مش مصدقين القرآن، ورينا بقى! أنت قلت

اللي مكذبين القرآن حينزل عليهم عذاب ورينا العذاب ده فين؟

(وَيَسْتَعْجَلُونَكَ بِالْعَذَابِ ۗ وَلَوْلَا أَجَلٌ مُّسَمًّى لَّجَاءَهُمُ الْعَذَابُ وَلَيَأْتِيَنَّهُمْ بَغْتَةً وَهُمْ لَا يَشْعُرُونَ)

العنكبوت: 53

يستعجلونك بالعذاب وإن جهنم لمحيطة بالكافرين زي واحد مثلا حب يستهزيء بواحد حب يقتله

والتاني ده لف حبل المشنقة حوالين رقبتة خلاص، في لحظة يشد خلاص كل حاجة تنتهي ... زي

واحد واقف على حديدة برجليه الحافية والحديدة موصول بيها سلك 3 آلاف فولت، والسلك ده في

كبس في إيد واحد وهو قاعد يستفز الواحد ده وقاعد يغضبه وقاعد يزعله وقاعد يقوله انت

متقدرش تعمل فيا حاجة وهو مش عارف ان ضغطة كبس واحدة تقضي على مصيره تماما وتقضي

تماما على هذا الانسان اللي واقف حافي على الحديد

"يَسْتَعْجَلُونَكَ بِالْعَذَابِ وَإِنَّ جَهَنَّمَ لَمُحِيطَةٌ بِالْكَافِرِينَ" العنكبوت: 54

قاعدين يستهزءوا هما مش عارفين إن ربنا محيط بيهم إحاطة كاملة

"يَوْمَ يَغْشَاهُمْ الْعَذَابُ مِنْ فَوْقِهِمْ" الآيات بتنتقل للحظة التي هما قاعدين فيها بيتعذبوا هما قاعدين

الوقتي يسخروا من النار وقاعدين يسخروا من قضية النار ويحولوها لمادة للاستهزاء فالآيات

فجأة نقلتك من الدنيا وهما قاعدين يسخروا ويستهزءوا بيك ويقولوك ورينا العذاب ده اللي انت

بتتكلم عنه لمنظرهم وهما في جهنم وهما قاعدين يتشبوا في جهنم المنظر الاخير في خطاب الآيات

لهؤلاء الكفار يا جماعة احنا قلنا ان سورة العنكبوت بتتراوح ما بين زمنين: زمن نزلت في المرحلة

الجهرية: الفترة التي هما الصحابة اتعذبوا فيها وهو ده الغالب على سمة السورة

وفي قول تاني أن سورة العنكبوت اخر سورة في مكة أصلا، يعني السورة التي قبل الهجرة مباشرة

فلما تيجي تحلل سياق سورة العنكبوت تلاقي ان اول 45 اية فعلا يناسبوا المرحلة الجهرية جدا

اللي هما فيها بقى **"وَوَصَّيْنَا الْإِنْسَانَ بِوَالِدَيْهِ حُسْنًا ... ٥٥"** الي هما فيهم سعد بن أبي وقاص لما

امه كانت بتعذبه وأهله كانوا بيعذبوه، فدي ماشية مع المرحلة الجهرية إنما من أول **"ولا تجادلوا**

اهل الكتاب إلا بالتي هي أحسن" ماشية مع نهاية مكة ليه؟ لان المسلمين كانوا هيهاجروا

ويروحوا ليهود ونصارى ويقابلوا اليهود فحيقابلوا أهل الكتاب، فالقرآن بيأهلهم قبل ما ينزلوا

يواجهوا أهل الكتاب، وده من إعجاز القرآن التأهيل قبل نزول الواقع، زي سورة مريم ماتزلت قبل

هجرة الحبشة لانهم حيروحو وواجهوا نصارى لاول مرة دولة كلها نصرانية فنزلت سورة مريم
 علشان تفاصيل حياة النصارى والرد على النصارى قبل هجرة الحبشة وكان من ثمرتها إسلام
 النجاشي يبقى إذن من مبادئ القرآن التأهيل قبل نزول الواقع، لازم قبل ماتنزل الواقع نعرف
 الشباب دول بيفكروا إزاي والتأهيل قبل التشغيل لازم شحن إيماني قوي جداً قبل ما ننزل نخوض
 الفتن الموجودة في الواقع.

النص الاولاني ذكر معه هجرة **"وَقَالَ إِنِّي مُهَاجِرٌ إِلَى رَبِّي"** أول 45 آية
 فدي تتناسب أول 45 آية، الهجرة الاولانية ديت تتناسب مع هجرة الحبشة، كأن النصف الاولاني
 من سورة العنكبوت بيهاّل لهجرة الحبشة.

طيب النص الثاني **"يَا عِبَادِيَ الَّذِينَ آمَنُوا إِنَّ أَرْضِي وَاسِعَةٌ"** العنكبوت 56
 محدش يقول أنه مش عارف يعبدني، محدش يقول انه مضطهد في دينه، محدش يقول إنه مش
 قادر يبقى متدين بيعلم بدينه، عندكم الدنيا واسعة هاجروا لاي أرض تقدرنا فيها دينكم، فدا
 النص الثاني يتناسب مع هجرة المدينة، لان هو اللي جه بعد **"ولا تجادلوا أهل الكتاب"** أهل الكتاب
 دول ماكنوش موجودين غير في المدينة

كأن سورة العنكبوت نصين ياجماعة: كأن النص الاولاني بيتكلم عن مواجهة المرحلة الجهرية،
 ويرجح أنه نزل في هذه الفترة وفيها الإشارة إلى هجرة الحبشة والنص الثاني بيتكلم عن التأهيل
 لهجرة المدينة، كأن الهجرتين العظيمتين اللي الصحابة قاموا بيهم في ذات الله المذكورين في سورة
 العنكبوت.

أحياناً في سور كده، سورة العنكبوت جمعت التأهيل للهجرتين، أعظم تضحيتين قدموهم الصحابة
 في حياتهم في سبيل نصره الدين بعد التضحية برقبتهم بالجهاد في سبيل الله.
 فسورة العنكبوت جمعت أعظم تضحيتين قدموهم الصحابة: هجرة الحبشة، وهجرة المدينة
 المنورة.

زي سورة طه كده هي السورة الوحيدة اللي جمعت الهجرتين اللي كلم فيهم موسى ربنا، يعني
 المرة الاولى اللي سيدنا موسى كلم فيها ربنا مذكورة في أول سورة النمل وهو تايه في مجاهيل
 سينا، والمرة الثانية اللي سيدنا موسى كلم فيها ربنا مذكورة في سورة الاعراف **"ولما جاء موسى
 لميقاتنا وكلمه ربه"**

السورة الوحيدة اللي جمعت المرتين هي سورة طه، علشان كد سميت سورة موسى وعلشان كده
 سميت سورة الكليم، اللي بتبهر قلبك طول ما أنت ماشي فيها بمواقف كلام موسى مع الله سبحانه
 وتعالى.

فسورة العنكبوت جمعت أعظم تضحيتين، سورة نازلة في فترات صعبة جداً وبتطالبنا إن إحنا نقف
 في وش واقع رهيب ضاغط علينا، إزاي إحنا لانستسلم لضغط الواقع.
 سورة العنكبوت بتتكلم عن ضغط الواقع، أهلك بيضغظوا عليك، والظالمين اللي بيحكموا بغير ما
 أنزل الله بيضغظوا عليك، وشبهات العلمانيين والنصارى والملحدين على انت بتضغظ عليك،
 والاستهزاء والسخرية من الاعلام في التوك شو من التيار الديني بتضغظ عليك، واقع كله ضغط
 وأعداء الدين أقويا جداً **"كمثل العنكبوت اتخذت بيتاً"** متهيأها بقا ياما هنا ياما هناك، وأهل الباطل
 أقويا وأهل الباطل معاهم فلوس، وأهل الدين ممكن يكون عندهم ضغوط دنيوية بسبب استمرارهم
 على رسالتهم.

سورة العنكبوت بتتكلم عن انسان لازم يواجه ضغط الواقع، ضغط الواقع ياجماعة مبقاش موجود
 غير لما بقى في واقع للفساد والضلال، فواقع الفساد والضلال لما جينا نقول ربنا الله، ضغط علينا،
 ضغط علينا في بيوتنا، ضغط علينا في الاعلام، ضغط علينا في دراستنا وشغلنا، ضغط علينا في
 نظرة المجتمع لينا، ضغط علينا في شبهات أهل الباطل اللي بيقولوها بقوة وهما مش خافين،

الوقتي في أي برنامج توك شو ممكن يجيبوا واحد ملحد يشكك الناس في عقيدتهم، ممكن يجيبوا واحد يشتم في البخاري، هو ده إيه؟!

معدوش خايفين من حد، عادوا خايفين مفيش حد يقدر يقف في وشهم أو يقدر يواجههم، خلاص بقوا حاسين إن الباطل كله يقدر يحميمهم، اللي هما بيعملوه ده، ضغط الواقع محصلش إلا لما الفساد بقى واقع، علشان كده علشان إحنا اللي نقدر نضغط على المجتمع ونخليه يتجه للدين لازم نبقي واقع، لازم ديننا يبقى واقع، لازم إخواننا ووجدتنا تبقى واقع، لازم روح الفريق اللي بينا وبين بعض تبقى واقع، لازم الدروس الايمانية في المساجد تبقى واقع، المعاهد العلمية التربوية تبقى واقع، الشغل الدعوي يبقى واقع، يبقى إحنا مش بس بنواجه ضغط واقع فاسد ومطلوب إن إحنا نصبر عليه، ده إحنا لازم نجاهد علشان ننشئ واقع صالح هو كمان يعمل ضغط، تلاقي المتبرجة وهي ماشية في الشارع مكسوفة زي زمان المتبرجات مبيحطوش مكياج في رمضان، مبيكشفوش شعرهم في رمضان ليه؟ مش تدين بس، بعضهم كان تدين مكسوفين من ربنا في رمضان، والبعض التاني ضغط واقع. زي ما كان كده عيب إن واحدة تلبس إسترتش، عيب كان بقى الدين اسمه عيب، إمتى الدين يبقى كمان اسمه عيب مش بس حرام؟ لان مش كل الناس يا جماعة، مش كل المحجبات الوقتي محجبات بسبب دين، في بنات عيب، بالنسبة لبيئتها ومكانها عيب، لما يبقى الدين كمان عيب، يبقى الدين بقى واقع وكمان بيعمل ضغط. عيب إن ولد يمشي مع بنت، عيب إن بنت تكلم ولد في الشارع محدش يرضى يتجوزها، ضغط واقع!

عاوزين ننشئ واقع للدين زي ما أهل الفساد جاهدوا لإنشاء واقع للفساد بقى بيضغط علينا الوقتي حتى في بيوتنا مش عارفين نتخلص منه، مش عارفين نواجهه علشان كده أول السورة ربنا طلب الصبر وطلب الثبات.

آخر السورة **"والذين جاهدوا فينا"** لا! ده مش بس مجرد الثبات أمام ضغط الواقع الفاسد، الثبات على دينكم، ده أنتوا لازم تجاهدوا علشان تنشأوا واقع صالح يضغط على الفاسدين، يضغط على المتبرجات، يضغط على العلمانيين بتوع التوك شو، و العلمانيين مكنوش موجودين من عشر سنين؟

كانوا موجودين، وكانوا بنفس درجة الفجور والعياذ بالله، أومال مكنوش بيتكلموا عن الالحاد وشتم البخاري بالمنظر ده ليه؟ كان في واقع صالح ضاغط عليهم، كان ضغط واقع، كان في ناس بعيدة عن المنكرات بسبب ضغط واقع

مكانش في شاب يقدر يحط إيداه على كتف بنت أو أكثر من كده كمان في الشارع لانه كان في ضغط واقع، مكانش ممكن مجموعة شباب على ناصية الشارع يقعدوا يشربوا مخدرات لان كان في ضغط واقع، الدين يا جماعة يجب أن يمثل ضغط واقع بحيث إن في ناس حتتبع الدين لانها خايفة من ربنا وفي ناس حتتبع الدين لانه عيب أنه ميعملش كده، ياريت نوصل للمرحلة ديت، ياريت ننشئ هذا الواقع، ياريت يبقى عندنا عزيمة إنشاء واقع، للاسف لما ببص للغرب بلاقي الغرب هما اللي عندهم عزيمة إنشاء واقع، بلاقي الناس دي طفحت الدم علشان توصل للي وصلته الوقتي، أمريكا وأوروبا يا جماعة علشان يوصلوا للي وصلوا له ضحوا، إحنا مقدرناش نقف في بلادنا قدام الطواغيت اللي ظالمتنا دنيا ودين، مقدرناش، هما عملوا ثورات وفضلوا عشرات السنين يدفعوا من دمهم ثمن إن الشعوب هي اللي تملك الحكم بحق وحقيقي، وبعد كد الناس دي فضلت ليل نهار بقالهم أربعمائة سنة يواصلوا الليل بالنهار علشان يترقوا علمياً وعلشان يربوا أولادهم على أخلاقياتهم ومبادئهم، وأول ما حسوا إن كيانهم اللي بينشأوه في خطر واجهوا الحرب العالمية الأولى وواجهوا الحرب العالمية الثانية، ودفعوا في الحربين حواليين 60 مليون قتيل 60 مليون واحد اتقتلوا منهم علشان الدول اللي أنشأوها وعلشان الواقع اللي أنشأوه ميقعش منهم .

يا جماعة إحنا الكلام ده مبنقول هوش من باب دموية الغرب، إحنا بنقول عن شعوب استعدت إنها تدفع 60 مليون قتيل من قلب شبابها علشان يحافظوا على كيانهم وعلشان يحافظوا على الواقع اللي هما أنشأوه، الناس دي تعبت

أنا ببص لبلدنا بلاقي مفيش عزيمة إنشاء واقع في التيار الديني، يا جماعة الدين مش إني أدرس فقه وعقيدة، يا جماعة فين التفسير؟ الكل على الفقه والعقيدة في الاول ليه؟ ضغط وواقع! يا جماعة التربية مش كتاب تزكية بيدرس جنب الفقه والعقيدة، التربية ديت لازم يتعمل لها معاهد، التربية ديت مرحلة، سنيين بيعيشها المنتزم الاول علشان قلبه يترقى قبل أن يتلقى المعلومات العلمية، لا كله بيدرسها كتاب ليه؟ ضغط وواقع. ياللي ماسكين دور التحفيظ، ياللي ماسكين دور التحفيظ حرام عليكم أنتوا قاعدين تتنافسوا مين اللي حيقدر يخرج أطفال عندهم ست سنين حافظين القرآن، وتفضلوا تضربوا العيال، وتعذبوا العيال علشان العيال تحفظ القرآن علشان يتقال إن الدار بتاعتك أو الدار بتاعتك خرجت ناس حافظة القرآن وهما عندهم ست سنين، طيب يا جماعة العيال دي بيبقوا حافظين القرآن ويخرجوا يبوظوا ليه؟ من الكبت اللي اتعملهم علشان يحفظوه، يا جماعة فهموهم الايات، يا جماعة اشرحولهم الايات في شكل قصص، يا جماعة حببوا العيال في ربنا اللي نزل القرآن، بدل ما تقعدوا تقهروهم بس على الحفظ مش لازم تحفظوه وهو عنده ست سنين خلوه يحفظ وهو عنده 15 سنة بس فهموه بس عيشوا قلبه، لا، ليه؟ ضغط واقع! لان كل تقييمه لنجاح الدار هي حفظت كم طفل في سن صغير قد إي؟ كل الجمعيات الخيرية إحنا بنكفل ألف أسرة، يا إخوانا تسعمائة أسرة منهم بينصبوا عليكم ورايحين لخمسين جمعية تانية غيركم، ثم يابني ما تمسك منطقة واحدة فيها خمسين أسرة وتتفرغ الجمعية ليهم؟ وتعملوا أسرة نموذجية وبدل ما يطلعوا يضربوكوا بعد كده وأنتوا اللي كنتم بتدوهم المعونات الغذائية ويقولوا أصل دول بتوع الدين، ما كنتم تعلموهم الدين وأنتوا بتعلموهم الدنيا! لا، أنا لازم الجمعية بتاعتي تبقى بتكفل ألف أسرة! ليه؟

ضغط وواقع، لان مقياس نجاح الجمعية إحنا بنكفل كم أسرة، طيب أنتوا بتكفلوا الاسرة بكام؟ بأربعين جنيه في الشهر، طيب الاربعين جنيه دول يعملوهم إيه؟ أنتوا بتقولولهم روحوا اشحتوا عند مية جهة، طيب ما تدوا الجمعية مبلغ محترم وتقللوا عدد الاسر، لا يبقى شكلنا بايخ لما نقول للجمعيات إحنا بنكفل خمسين أسرة بس،

ضغط وواقع، إحنا في المجتمعات العربية نفسيتنا معدناش عزيمة إنشاء واقع، عزيمة مواجهة الواقع الغلط، عزيمة لا كما قال عمر بن الخطاب **"يعجبني الرجل إذا سيم خطة خصف أن يقول بملء فيه لا"**

-إن احنا نقدر نقول لا، دا اللي ناقص يا جماعة النفسية العربية أنا بقول كده لان فعلا دي نفسية الشعوب العربية .

إن احنا نقدر نقول " لا " لا للحاكم الظالم ، إن الشاب الملتزم يقدر يقول لا للبننت اللي جاية تكلمه ،زي مرثد لما عناق قالت له هلم فبت عندنا الليلة قال لها إن رسول الله قد حرم الزنا حرام يا عناق وكان هيدفع روحه تمن الموقف ده لان هو كان رايح مكة كان مفروض يتقتل لو كانوا اكتشفوه، وهي اكتشفته وهي كافرة هتدل عليه

حتي لو هدفع رقبتي تمن كلمة لا لا يا عناق " لا " زي الرجل اللي في المدينة المنورة لما كانت امرأة بغى وقابلها بعد الاسلام ومد ايده عليه قالت له .. مه يعني لا (حط إيدك جنبك) إن الله قد أتى بالاسلام وأذهب الجاهلية، الرجل فضل قاعد يبصلها من الدهشة راسه خبطت في حيطه اتفتحت راسه اتفتحت! ولما راح للنبي قال له: أنت عبد أراد الله بك خيرا لان ربنا بعثه رساله فورا علي الذنب بتاعه عقوبة الذنب في الدنيا يعني قالت له مه يعني ازاى انك تقولي لا لقدام أي شاب عايز يكلمك في علاقة محرمة، كلمة " لا " دي كلمة نقصانه يا جماعه إن احنا نقدر نقول "لا" لقدام أي حاجة بتعطلنا عن طريق ربنا، نقدر نقول لا لقدام أي حاجة بتشغلنا عن طريق ربنا، الرسول عليه

الصلاة والسلام يقول **"سبعة يظلهم الله في ظله يوم لا ظل إلا ظله منهم رجل دعت امرأته ذات منصب وجمال فقال إني أخاف الله رب العالمين"** بعض المفسرين للحديث قالوا المرأة دي مش دعتة للزنا دي دعتة للزواج، إنما هو لقي إن واحدة منصبها عالي، واحده غنية، واحدة جميلة جدا جدا جدا، واحدة استايل عشان أتجوزها يبقى أنا هبقي زوج الست يبقى أنا أن شاء الله أجي أقول لها قومي الليل تقولي نعم يا أخويا هو أنا متجوزك عشان الصبح في الدعوة والظهر في العلم وبعد المغرب بتدي درس وبالليل... وتديني ساعة ولا ساعتين في اليوم بس لا ماينفعش فقال لها "لا" لأنه عارف إنه مش هينفع يمشي علي ترتيب دينه مع الموديل المرفه دنيويا ده، هو عايز إنسانة صاحبة رسالة تشيل الرسالة معاه مش إنسانه مرفهة دنيويا تاخده من دينه .. لا كلمة " لا "ياجماعة الغرب عنده قدرة علي إنشاء الواقع .. احنا ما عندناش هذه القدرة ربنا بيقول **"ياعبادي الذين ءامنوا إن أرضي واسعة"**

نروح فين يارب ، نروح فين، نروح فين يارب احنا عايشين في مكة .. مراتي من مكة وأهلي من مكة .. وأمي وأبوي من مكة .. وولادي رايعين المدارس بتاعة مكة .. وأنا المحل بتاعي في قلب السوق في مكة .. واصحابي من مكة .. أرضي وسماي أروح فين يارب اروح فين .. أروح بلد تانيه لا أعرف فيها حد، ولا أعرف أي مخلوق،

وافرض ولادي ماجوش معاي، وافرض أهلي مارضوش يسيبوا مراتي تيجي معاي، ومحلي هسيبه وهابدأ تجارة من جديد! .. وهبدأ مجال عمل من جديد! .. وهبدأ حياة من جديد! .. ما اقدرش يارب مفيش حاجة اسمها ما اقدرش

لازم يبقى عندكوا عزيمة إنشاء الواقع لازم يبقى عندكوا عزيمة إن أنا عشان ديني أقدر أنشأ واقع الامريكان اللي هما البورتستانات الاوروبين لما اتعرضوا للاضطهاد الديني في أوروبا هاجروا كلهم أمريكا .. أمريكا دي دولة نشأت

بالحجرة يعني دولة نشأت بالتضحيات هاجروا كلهم أمريكا وحطوا المواثيق بتاعتهم اللي بيسموها المباديء الفوق دستورية وحطوا المواثيق الاخلاقية والمبادئية بتاعتهم وقاتلوا وخاضوا حروب تحرير، خاضوا حروب توحيد ابراهام لينكولن، وخاضوا حروب توحيد أمريكا الشماليه والجنوبية بدمهم ياجماعه الناس دي عشان تنشيء واقع ؛ أمريكا هاجرت ودخلت الحرب العالمية الاولي والثانية أمريكا دخلت في التانيه بتكلم علي أمريكا وأوروبا عموما وعملوا ثورات جبارة علي الحكام الظلمة اللي حكموهم واستحملوا عشرات السنين اضطرابات احنا البنزين نقص عندنا شوية الناس نزلت عملت ثورة ع الثورة انتو بتعملوا ايه بنزين مين اللي ينقص، نحن نريد عزيمة إنشاء واقع دين

عايزين واقع للدين عايزين **"ياعبادي الذين ءامنوا إن أرضي واسعة"** نخرج من **"إن أرضي واسعة"** أول حاجة نخرج بيها : **عزيمة إنشاء الواقع** ابنوا .. ابنوا عشان الدين لما بقف قدام مسجد المدينة المنورة أقول يااااااه دا كان ترب .. دا كان مقبرة .. دا كان مكان ترب مشركين الرسول حوله بيئة إيمان خرج منها 120 ألف قائد قادوا تغيير العالم كله لما بقف قدام قباء دا كان ايه خرابه ياجماعه دي كانت خرابات الرسول كان عنده عزيمة إنشاء واقع واجه الدنيا في مكة وبني واقع تربوي للدين ثم بني واقع دولي للدين في المدينة ثم خرج للعالم بهذا الواقع إن احنا يبقى عندنا هذه العزيمة إنما الواحد يبص كده لنماذج بره ويقول يااااااه يعني هم قادرين يبنوا دولهم ويكافحوا عشان مبادئهم واحنا يارب مش قادرين!

المعني الاول في **"يا عبّادي الَّذِينَ آمَنُوا"** عشان كده في الاول الذين ءامنوا ؛ انتوا بجد مؤمنين؟ المفروض إيمانكم بالله ده يبقى قوة دافعة لبناء الحياة مش يبقى قوة للانعزال عن الحياة المفروض إيمانكم ده يبقى قوة لان تستطيعوا أن تعيشوا في سبيل الله؛ مش بس ما بنعرفش غير إن احنا نموت في سبيل الله إن احنا نقدر نعيش في سبيل الله نقدر ننشيء عايزين نحول الشرايط

والكتب بقي اللي احنا سمعناها لواقع عايزين نحول الشرايط اللي عن تربية الاطفال وفي الاخر اولادنا مش عارفين نربيهم ..مفيش واقع

مفيش بيئة إيمان للاطفال شرايط كتير لكي يا أختاه ..وأختاه أين أنتي ..وأختاه اعلمي ..وأختاه روعي ..وأختاه تعالي وفي النهاية مافيش بيئات إيمان نسائية حقيقية. قاعدين نتكلم دروس عن التربية وكتب عن التربية وفي الاخر مفيش بيئات إيمان حقيقية ياجماعه عايزين ننقل بقي من الكلام للتطبيق عايزين ننقل من عزيمة الكلام إلي عزيمة إنشاء الواقع! وده لن يحدث إلا لما نطبق

"يا عبادي الذين ءامنوا إن أرضي واسعه فإياي فاعبدون"

اللي هو مبدأ التضحية ياجماعه. دا مش هيحدث إلا لما نطبق اللي هو (مبدأ التضحية) اللي هو مبدأ انك انت لازم تقبل مبدأ التضحية لان ما أراه واضح في كثير من الاخوة والاخوات للاسف الشديد الكفر بالتضحية معدش حد مستعد يجوع عشان الدعوة إلى الله، معدش شايف حد كدا، معدش حد مستعد يسافر عشان يدور على مربى يربيه، خلاص عزيمة الاخوة خلاص كل الاخوة تقولي افتحلي قلبك فانت تكلمه يقولك اصلي مفيش جنب بيتي مسجد مفيش بيئة إيمان جنب بيتك؟؟؟ هو احنا لو كنا زمان قعدنا في بيوتنا ولا جنب بيوتنا كنا وصلنا لحاجة

دا لولا إن ربنا فتح علينا وسافرنا برا مصر كنا وصلنا لحاجة إخوانا لازم الدين يبقى غالي لدرجة إن احنا ممكن نساfer عشان ديننا، ممكن نتعب عشان ديننا، ممكن نجوع عشان رسالتنا، ممكن نبدأ حياة من جديد عشان قضيتنا **"يا عبادي الذين آمنوا إن أرضي واسعة فإياي فاعبدون"**

العنكبوت56

إذن النقاط اللي احنا اتكلمنا عنها في هذه الاية، قبل ما ارجع للثلاث آيات بتوع المشركين تاني يعني هقفل الكلام فيهم **اتكلمنا عن :-**

1- زمن نزول هذه الاية وقلنا غالبا نزلت في نهاية مكة فكانت تأهيل لهجرة المدينة المنورة وقلنا هنا إن سورة العنكبوت هي الوحيدة اللي جمعت الهجرتين وأعظم تضحيتين قدمهم الصحابة لابد من التأهيل قبل النزول للواقع اذن لابد من التأهيل قبل التكليف القرآن كان بياهل الصحابة الاول للهجرة قبل ما يقول هاجروا فالسورة هنا بتأهلهم إنهم يضحوا ويهاجروا

2- قلنا في صفتين للمؤمنين في هذين الايتين الصفة الاولى: عزيمة إنشاء الواقع عزيمة بدء حياة كاملة من جديد في بلد تانية عشان الدين يبقى لك واقع خلاص وقلنا إنه بدون إنشاء واقع سيظل ضغط الواقع الفاسد يضغظ علينا لا عارفين نتقدم للامام ولا عارفين نعمل حاجة ليه لان الواقع الفاسد ضاغظ علينا فلما ننشئ واقع صالح عشان كده لازم يكون عندنا عزيمة إنشاء واقع صالح... اللي هي صفة المؤمن الثانية في الاية صفة(التضحية) مش مبدأ الكفر بالتضحية يا جماعة من عشرين سنة في أخوة كتير لما سمعت كلام الشيوخ بتاع الدروس رموا أموالهم، وسابوا دراستهم ، ورموا الدراسة، باعوا عطور أمام المساجد ، وبنات سابت الكليات وقامت متزوجة أي أخ مش دارسة عنه أي حاجة غير إنه بلحية وقالت الاخ الملتزم الذي يصلى قيام الليل ووقفت في وش أمها وابوها، وناس عملت تضحيات جبارة ولكن جزء كبير من التضحيات دي، مكانش سليم جزء من التضحيات دي مكانش اصلا تبع الدين بمعنى يعني واحدة سابت كليتها وتزوجت أخ لا يوجد في حياته اي مؤهل أنه يتزوجها أو أي وظيفة غير إنه أخ ملتحي بلحية، دا كلام غلط أنه مثلا فيه اخوات لبست نقاب ، في نساء كانوا بيغطوا وشهم كان النقاب لسه جديد على المجتمع وكانوا بيغطوا وشهم عشان يعرفوا يسترزقوا عشان لهم مصالح، عشان لهم مصالح معينة الصدمات اللي حصلت لبعض الملتزمين والمستلزمات إنهم اللي مرضوش يحصلوا رزق خالص ولا يفكروا في الدنيا فلما كبروا وعيالهم كبروا لقوا نفسهم مش قادرين يصرفوا على عيالهم ويجوزوهم اطلقوا من بعض من الصدمات اللي حصلت أن بعض الاخوات سلموا دينهم وحياتهم لآخوة عندهم دقن وفي الحقيقة معندهم مش أخلاق الدين ومن الصدمات اللي أخذها إخوة لآخوات مجرد نقاب الصدمات دي والاخوة اللي سابت التعليم ووقفت تباع عطور أمام المساجد

بعض الاخوة طبعاً مش الكل فالصدمات دي لما جاء الجيل يتلقاها خاف من التضحية مش بدأ يفهم الفرق بين التضحية والواقعية، ما بين الفكر الواقعي وبين التضحية، لا قال لك التضحية يبقى خطر وقال التضحية ندم فكفروا بالتضحية فمعدش راضي يضحي عشان يتفرغ للدعوة إلى الله معدش أخ راضي يضحي أنه يشتغل شغلانة تكفى بيته بالعافية عشان يوفر باقي وقته هو وزوجته لطلب العلم والدعوة إلى الله معدش حد راضي يضحي

هو دا اللي شايفينه الوقتى لان الاخوة خلطت ما بين الواقعية والتضحية يا جماعة الواقعية أن انا لازم اتزوج وأن انا لما أجي اتزوج أشوف مواصفات مراتي الدينية والدينية إن انا لما أتقدم للعروسه لازم تدرسني دينيا ودينيويا الواقعية إن انا مضيعش شهادتي إلا لو انا بقى عالم في الشرع والدقيقة عندي تساوي والدين طلبني إنما انا إنسان عادي اكمل، أخذ شهادتي الواقعية بتقول أننا لازم يبقى ناجحين أو على الأقل مش شاذيين في الدنيا على الأقل ما عندناش شذوذ يفتن الناس عن الدين ويخوفهم من الدين دي الواقعية إنما التضحية إن انا أبذل عمري عشان ديني التضحية دا لولا تضحية الصحابة بالهجرة مكنتش المدينة المنورة قامت مكنش الدين قام يا جماعة لولا التضحية

يبقى ده تفريق خطير بين الواقعية والتضحية

فالواقعية هي احترام الواقع واحترام تحصل الاسباب

أما التضحية فهي "فطرق مسحا" لما سيدنا سليمان ذبح عشرين الف فرس عشان عطلوه عن

جلسة تسبيح عطلوه عن جلسة ذكر ساعة او ساعتين او ثلاثة او أربعة ساعات دبح عشرين الف فرس أو وهبهم كلهم للجهاد في سبيل الله وخرجهم من ملكيته هي دي التضحية إن انا اضحي بكل ما يعطني عن الله إن انا اضحي عشان يبقى فيه دعوة، إن أنا اضحي علشان التربية ترجع تاني. إن انا اضحي عشان الشباب اللي في الشارع التائهين دول يتوبوا لربنا إن احنا نضحي يا جماعة عشان نرجع نشغل لنصرة دين الله إن احنا نضحي زي الصحابة إنما مش أروح أرمي مراتي وأطلق مراتي وارمي بيتي واسيب شغلي دي مش التضحية التضحية هي إن أنا أرضى بالكفاف في الحياة من أجل أن أتفرغ لنصرة ديني وأتفرغ لبنائي في الدين يبقى دي الصفة الثانية اللي هي الصفة الاولى صفة عزيمة إنشاء واقع الصفة الثانية صفة التضحية الفائدة الرابعة في الاية. إن ربنا قبل ما يقول "إن أرضي واسعة فأبي فعبدون"

قبل ما يقولهم ضحوا قبل ما يقولهم ابنوا واقع للدين قبل ما يقولهم هاجروا ربنا قال "يا عبادي الذين آمنوا"

يا عبادي: يعني يا أهل العبادة الذين آمنوا: يعني يا أهل الايمان يعني ربنا بيقولوا يا جماعة إن المفروض العبادة والايمان دي قوة دافعة في الحياة المفروض زي ما ربنا قال كذا واحنا بنتكلم في سورة العنكبوت واحنا بنشرح قبلها قال "إن الصلاة تنهى عن الفحشاء" تنهى: يعني الصلاة دي لها قوة فاعلة في الحياة الوقتي المسلمين يدخلوا يصلوا ويخرجوا المرتشي يكمل رشوة واللي ظالم مراته يكمل ظلم واللي مطلعة روح زوجها تكمل تطليح روح زوجها

واللي بيأخذ ربا يكمل أخذ ربا من البنك الصلاة لايوجد لها قوة تغييرية في المجتمع لا توجد لها أثر تغيير في المجتمع المفروض هنا سورة العنكبوت بتقولك لا، المفروض إن العبادة والايمان دا بينشئ جواك قوة على مواجهة الظالمين، وقوة على التغيير، وقوة على مواجهة الظالمين، وقوة على ثورة تصحيح لحياتك عشان تنطلق إلى الله بقوة هل انت عبادتك كذا؟ هل انت إيمانك كذا؟

الايمان المغير يا جماعة في عبادة مغيرة وعبادة فاترة وفي إيمان مغير وفي إيمان فاتر إيه الفرق بين الاتنين؟ الايمان المغير والايمان الفاتر. يعني لو جيتلك الوقت قلت لك: ألحق، إيه قلتك بكره في النمسا درجة الحرارة هتبقى 30 تحت الصفر روجت انت قلت إيه بجد دا خبر صعب جدا يلا جماليتيني وخلص قلتك انت متفرعتش روجت قلت إيه اتفرع إيه يا عم دا في النمسا إنما لو جيت أقولكم الحقوا يا جماعة بكره في مصر في موجة حر مرعبة هتبقى درجة الحرارة 70

وا احتمال إن 30% من الناس يموتوا بكره فلكم هتجروا بسرعة اللي يصلح تكييفه واللي يركب تكييف بسرعة واللي هيشترى مروحتين بالفلوس اللي معاه ليبيبيه لاني الموضوع في مصر يبقى الاول خبر انتوا صدقتوه بس في النمسا والثاني خبر صدقتوه ولكن الاول خبر لا يخصكم في واقعكم ولكن الخبر الثاني خالكوا تتحركوا او تتغيروا بسرعة هو دا الايمان المطلوب يا جماعة الحقوا دا في جنة عرضها السماوات والارض الحقوا دا في نار والعياذ بالله في ناس في الدرك الاسفل فيها الحقوا دا في يوم قيامة 50 الف سنة الحقوا دا في منكر ونكير في القبر الحقوا الله يراقبنا في كل أفعالنا الايمان المثمر الايمان الذي يمثل قوة دافعة، لما تعرفي إن الله هو القادر أزاى متجهريش بكلمة الحق في وجه الظالم خيفة ليه لما انتي مؤمنة إن الله هو القادر احنا عايزين الايمان الذي يعطينا القوة أن نواجه به الظالمين الايمان الذي يعطينا القوة أن نعمل في الدعوة الايمان الذي يعطينا القوة أن نغير في الواقع وبردوا في عبادة مؤثرة وعبادة فاترة: يعني ربنا يقول للنبي صل الله عليه وسلم **"كلا لا تطعه واسجد واقترب"** يعني إيه ساجد واقترب يعني اسجد ولكن السجود اللي يقربك من ربنا احنا بنسجد ولكن مبنقربش ليه؟ انتي بتسجدي برأسك ودماعك شته في 50 موضوع أنت بتسجد لجسمك وقلبك في قضايا تانية خالص يبقى عايزين العبادة أي **"إن الصلاة تنهي عن الفحشاء"**

سورة العنكبوت بتقولك إن العبادة دي لها قوة فاعلة في الحياة واجهوا ضغط الواقع بالعبادة واجهوا مسئوليات حمل الرسالة في حياتكم بالعبادة ولا انتوا فاكرين إن احنا مش ورانا رسالة !!! انتوا ناسيين إن احنا الوقتي قلب الاسلام بيطن كل يوم في برنامج التوك شوه في شبهاض ضد العقيدة احنا كتر كلامنا عن التربية في المعهد القرآني نساكم يا جماعة إن احنا في واقع وفي معركة حق وباطل او عوا تنسوا إن احنا في معركة او عوا تنسوا إن التيار الاسلامي الان بيمنع من انه توصل رسالته للناس او عوا تنسوا ان شريعة ربنا مغيبة وإن شرع الله غير محكم او عوا تنسوا إن الشباب فاسد وبيرتكب المنكرات ومش لاقى حد يوصله لربنا او عوا تنسوا إن العلمانيين عاملين شغالين على تدمير عقيدة الناس بالشبهاض في 28 قناة توك شوه ليل نهار او عوا تنسوا يا جماعة إن احنا مطعونين في قلب الاسلام او عوا تنسوا إن دينكم جراحه نازلة او عوا تنسوا الكلام دا يبقى أين العبادة المغيرة؟ وأين الايمان المغير؟ دي الفائدة الرابعة في الاية.

الفائدة الخامسة في الاية لو قلنا الاية للمتزمين النهاردة يا جماعة "يا عبادي الذين آمنوا إن

أرضي واسعة فأبي فعبدون" يا ملتزمين يلي مش عارفين تشيلوا الرسالة وتواجهوه الباطل

وتنشوا واقع تربوي سليم للدين وتطبقوا دينكم وتعبدوا ربنا في أرضكم لو سمحت هاجروا، لو

سمحت قدامكم 6 شهور مهلة لو سمحت يا كل واحد وواحدة بيسمعوني دلوقتي على الغرفة

الصوتية قدامكم 6 شهور مهلة كل واحد منكم حيسافر دولة تانية يعني هنقول مثلا لو هجرة

الحبشة أو هجرة المدينة ، هتسافروا أو غندا مثلا خلاص هتسافروا أو غندا وهتروحوا تعيشوا فيها

ورتبوا بقى حال أولادكم وحال مراتكم وخذوا بالكم يا جماعة إن الهجرة خطر اللي هيتمسك وهو

بيهاجر هيقتل زي الصحابة أنا بقولكم واقع الصحابة بالضبط فانتوا هيبقى عندكم 3 كوارث

1- الكارثة الاولى أسيب بلدي أزاى ومصالحى وتجارتى ومحلى ومصدر رزقى وأهلى أسيبهم

إزاى

2- النقطة الثانية طيب نخرج من البلد أزاى هو اتقتل وأنا خارج دا كان واقع الهجرة بتاع الصحابة

3- النقطة الثالثة أروح فين هروح أو غندا أكل منين هشرب منين لو مرضت اتعالج إزاى وفين لو

حصلت لي مشكلة أستغيث بمين بعد الله سبحانه وتعالى

دول 3 مشاكل نفسية جبارة واجهت الصحابة في الهجرة حللوا الموقف نفسيا يا جماعة عشان

تفهموا كمية التضحيات التي بذلت فتخلوا بقى لو احنا قلنا للمتزمين النهاردة يلا يا جماعة 6

شهور وهتسافروا لاوغندا والذي لن يهاجر سينزل فيه قول الله **"إن الذين تتوفاهم الملائكة ظالمي**

أنفسهم" هتبقوا ظلمة عند ربنا والملائكة هتنزل تعذبكم في القبر لانكم ظلمة عند الله ولن يشفع لكم

التزام ولن يشفع لكم مستوى إيماني ليه؟ لانكم مش رضيتم تهاجروا تخيلوا بقى إيه إلي هيتقال؟ إيه هو دا الدين .هو الدين بيقول إن أنا اسيب بلدي .هو الدين... هو الدين أيوة يا جماعة في لحظة من اللحظات كان دا الدين في لحظة من اللحظات كان التضحية هي الدين. عشان الدين يقوم دين أبو بكر وعمر دين التضحية احنا سيبنا الدين ليه سيبنا دين المجاهدة سيبنا إن احنا نبذل كل ما في وسعنا من أجل إقامة دين الله ليه؟

سيبنا دين الرسالة والمسئولية عن الدين عن الواقع ليه؟ كفرنا بهذه المعاني ليه هذه المعاني العالية يعني هذه الفائدة السادسة في الاية ودي رسالة للدعاة رسالة لنا لما نيجي نشتغل في الدعوة يا جماعة ورسالة للدعاة إن المعاني دي عالية في دعاة كثير فاكيرين إن المعاني دي مفيش حد هيقبلها المفاجأة يا جماعة إن المعاني العالية دي في كتير اوووي هيقبلها بس لو عرفوا إن دا الدين ودا من أهم مقاصد سورة العنكبوت وهي **تصحيح مفهوم الالتزام** إن الناس فاكرة الالتزام زي ما بدأنا الرحلة من أولها من أول درس وأنا بقول لكم إن من أخطر مقاصد سورة العنكبوت (تصحيح مفهوم الالتزام) إن الالتزام مش معناه ان انا أربي دقتي وانتي تغطي منخريك وبنوك لان طبعا الوقت 90% من الاخوات كاشفين عينيهم، وأنت تغطي منخريك وبقك ويبقى ده حجاب أمهات المؤمنين مين قال إن دا الالتزام يا جماعة أول ما بدخل دار تحفيظ قرآن ألقى الاخوة اللي بيعلموا التجويد قاعدين يقولوا للطلبة اتعلموا يلا النون الساكنة والتنوين فالرسول بيقول أهل القرآن هم أهل الله وخاصته أهل القرآن مين يا عم هو اللي عارف النون الساكنة والتنوين بقى أهل القرآن يا جماعة حرام عليكوا كل واحد عايز يسخن الناس على حاجة يقوم جايب المعاني العظيمة في الدين ويسقطها عليها!!! أهل القرآن أصحاب الاهلية في قيادة الامة بالقرآن بقى اللي عارف النون

الساكنة والتنوين !!! دا اسمه التجويد عليه حسنات والقراءة السليمة عليها حسنات **"ويتلونه حق تلاوته أولئك يؤمنون به"** إنما ليه يا إخوانا أهو بالضبط كدا الالتزام بقى كل واحد ربا دقنه ملتزم سورة العنكبوت بتقول اللي مش هيبقى مع الدين ومش يثبت عليه أمام الفتن وأمام ضغط الواقع الفاسد ومش هيضحى عشان الدين ومش هيدعوا إلى الله ما ميسماش ملتزم دا منافق والعياذ بالله **"وليعلمن الله الذين آمنوا و ليعلمن المنافقين"**

السورة المكية الوحيدة اللي ذكر فيها لفظ النفاق. يبقى رسالة لكل من سيعمل في الدعوة إلى الله أول حاجة:

ارفعوا أفق الناس أوعوا تظنوا إن الناس لن تقبل رفع الأفق الناس هتقبل رفع الأفق بس لما احنا الاول نطبقها لما احنا نتكلم عن التضحية واحنا بنضحى عشان دينا لما نتكلم عن المجاهدة واحنا بنجاهد عشان دينا لما نتكلم عن البذل واحنا بنبذل عشان دينا تاتي حاجة: هناك من سيقبل كل معاني التضحية ولكن إن دعي إليها. لانيأس من تغيير الواقع يا جماعة آخر حاجة بقولها في الاية دي أنه دون تطبيق هذه الاية لن يقوم الدين في الارض دون أن يوجد ناس تضحى عشان الدين بكل شئ حتى لو بأهلها ووطنها وأرضها وسماءها وتجارها ومصالحها لن يقوم الدين في الواقع إلا إن وجد ناس مستعدين أن يتعرضوا لاي خطر في سبيل الدين .لن يقوم الدين في الواقع إلا إن وجد هناك ناس عندهم استعداد لعزيمة إنشاء واقع ولو كان الدين في المريخ .قال رسول الله صل الله عليه وسلم **"لو كان الايمان في الثريا لبلغه رجال"** يعني إيه؟ يعني لو في العصر الحجري ربنا قال إن الايمان في كوكب المريخ كان فيه مؤمنين اخترعوا السفن الفضائية عشان يطلعوا إزاي؟ كانوا هيعانوا بسبب صدقهم مع الله.في ناس عشان ربنا مستعدة تعمل أي حاجة. أنت منهم؟ أنت من الناس دول؟ أنت من الناس اللي مستعدين يتحملوا التضحيات الثلاثة العظمى لقرار الهجرة

-تضحية ترك مصالحهم في البلد وترك أهلك

-تضحية التعرض لمخاطر السفر لانك مهدد لو اتمسكت وأنت مسافر

-تضحية إنشاء واقع جديد في أرض الغرباء البعداء اللي إنت منتش عارف عنها حاجة.

الثلاث تضحيات دول والثلاث قرارات دول كانوا هما وراء الهجرة. وبدون أن يوجد ناس عندهم هذه العزائم الثلاثة. وبدون أن يوجد ناس عبادتها وإيمانها بينشئوا عندها قوة انها تقبل الثلاث أشياء دول لن يقوم الدين في الواقع على أيدينا، وسيبتعث الله أناس آخرين غيرنا يقبلون هذا الدين فيقوم الدين على أيديهم في الواقع. طبعاً يا جماعة يعني انتوا ممكن تقولوا إيه!!! هو دا الالتزام، ومينفعش أبقي ملتزم غير كدا .

لا طبعاً دا مش الالتزام ، يعني دا موضوع ربنا قال بعده **"والذين آمنوا وعلّموا الصالحات لنبوئهم من الجنة غرفاً"** الفردوس الاعلى يعني اللي هيعملوا كدا دول أهل الفردوس الاعلى اللي هيعملوا كد دول هما دول اللي هياخدوا الفردوس الاعلى. يعني لما هنتكلم المرة الجاية على إن ثمار التضحية وثواب التضحية. إن اللي بيضحي هياخد يا جماعة. إن اللي هيقبلوا هذا الكلام هما دول سكان الفردوس الاعلى هما دول جيران الانبياء في الفردوس الاعلى هما دول جيران الصديقين والشهداء في الفردوس الاعلى هما دول جيران الانبياء في الفردوس الاعلى هما دول الذين سيجاورون مالك الملك مع الملائكة في الفردوس الاعلى باذن الله سبحانه وتعالى. يبقى مش أي حاجة على قد ما هتبدل على قد ما هتاخذ. وعلى قد ما ربنا يعطيك وربنا أعظم وأعظم

إن شاء الله باذن الله المرة الجاية نستأنف شرح الايات لان انا يعني يمكن الاية الوحيدة اللي وقفت معاها بالتفصيل هي الاية رقم (56)

" يَا عِبَادِيَ الَّذِينَ آمَنُوا إِنَّ أَرْضِي وَاسِعَةٌ فَإَيَّي فَاَعْبُدُون "

ولكن الثلاث آيات اللي قبلهم لسه بعض التعليقات مكملتهاش فيهم والايات اللي بعدهم لسه بردوا تعليقات لم أكملها فيهم ربنا يسددكم ربنا يبارك فيكم.

تم بحمد الله

شاهدوا الدرس للنشر على النت في قسم تفريغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>